

摘藻堂四庫全書薈要

集部

欽定四庫全書薈要卷一萬九千八百二十

集部

唐文粹卷七

宋姚鉉編

古賦庚

總一十四首

鳥獸昆虫

大鵬賦

李白

鵬賦

杜甫

白鵝賦

蕭穎士

白鸚鵡賦

王維

感二鳥賦

韓愈

白羽扇賦

張九齡

元猿賦

吳筠

麈尾賦

陳子昂

由鹿賦

呂溫

蠶賦

陸龜蒙

秋蟲賦

羅隱

蝨賦

李商隱

後蝨賦 陸龜蒙

蝨賦 李商隱

大鵬賦 并序

李 白

余昔於江陵口見天台司馬子微謂余有仙風道骨可
與神遊八極之表因著大鵬遇希有鳥賦以自廣此賦
已傳于世往往人間見之悔其少作未窮宏達之旨中
年棄之及讀晉書覩阮宣子大鵬讚鄙心陋之遂更記
憶多將舊本不同今復存于集豈敢傳諸作者庶可示

之子弟而已其辭曰

南華老仙發天機于漆園吐崢嶸之高論開浩蕩之奇
言徵至怪于齊諧談北溟之巨魚吾不知幾千里其名
曰鯤化成大鵬質凝胚渾脫脩鬣于海島張廣翅于天
門刷渤澥之春流晞扶桑之朝暾赫奕乎宇宙憑凌乎
崑崙一鼓一舞煙濛沙昏五嶽為之震蕩百川為之崩
奔爾乃蹶厚地摩太清亘層霄突重溟激三千以崛起
搏九萬而迅征背葉太山之崔嵬翼舉垂雲之縱橫左

迴右旋倏陰忽明厯汗漫以天矯排閭闔之崢嶸簸鴻濛扇雷霆斗轉而天動山搖而海傾怒無所搏雄無所爭固可想象其勢髣髴其形若乃足縈虹蜺目耀日月連軒沓拖揮霍翕忽噴氣則六合生雲灑毛則千里飛雪邈彼北荒將窮南隅遞逸翮以傍擊鼓奔飈而長驅燭龍銜光以照影列缺施鞭而啟塗塊視三山杯觀五湖其動也神應其行也道俱任公見之而罷釣有窮不敢以彎弧莫不投竿失鏃仰之長吁爾其雄姿壯觀映

背河漢上摩蒼蒼下覆漫漫盤古開天而直視羲和倚
日以傍歎繽紛乎八荒之間隱映乎四海之半橫大明
而掩晝若混茫之未判忽騰覆以迴旋則霞廓而霧散
然後六月一息至于海湄歛翳景以橫樁逆高天而下
垂憇乎泱泱之野入乎汪漭之池猛勢所射餘風所吹
溟漲沸渭巖嶽紛披天吳為之怵慄海若為之躑踞巨
鼇冠山而却走長鯨騰海而下馳縮殼挫鬣莫之敢窺
吾亦不測其神怪而若此蓋乃造化之所為豈比夫蓬

萊之黃鵠誇金衣與菊裳耻蒼梧之玄鳳耀綵質與錦
章既服御于靈仙亦馴擾于池隍精衛殷勤于銜木鷄
鵠悲愁乎薦觴天雞警曙于蟠桃踰烏炳耀于太陽不
曠蕩而縱適何拘攣而守常未若茲鵬之逍遙無厥類
而比方不矜大而暴猛每順時而行藏叅玄根以比壽
飲元氣以為漿戲暘谷而徘徊憑炎洲而抑揚俄而希
有鳥見而謂之曰偉哉鵬乎若此之樂也吾左翼掩乎東
極右翼蔽乎西荒跨躡地絡周旋天綱以恍惚為巢以

虛無為場我呼爾遊爾呼我翔於是大鵬許之欣然相
隨此二禽已登于寥廓而斥鷃之輩空見笑于藩籬

鵬賦

并進表

杜 甫

臣甫言臣之近代陵夷公侯之貴磨滅鼎銘之勲不復
照耀於明時自先君恕預以降奉儒守官未墜素業矣
亡祖故尚書膳部員外郎先臣某脩文於中宗之朝高
視於藏書之府故天下學士至于今而師之臣幸賴先
臣緒業自七歲所綴詩筆向四十載矣約有千餘篇今

賈馬之徒得排金門上玉堂者甚衆矣唯臣衣不蓋體
常寄食於人奔走不暇祇恐轉死溝壑安敢望仕進乎
伏惟明主哀憐之儻使執先祖之故事拔泥塗之久辱
則臣之述作雖不足以鼓吹六經先鳴數子至於沈鬱
頓挫隨時敏捷而揚雄枚臯之流庶可跂及也有臣如
此陛下其舍諸伏惟明主哀憐之無令役役便至於裒
老也臣甫誠惶誠恐頓首頓首死罪死罪以為鵬者鷲
鳥之殊特搏擊而不可當豈但壯觀於旌門發狂於原

隰引以為類是大臣正色立朝之義臣竊重其有英雄之姿故作此賦實望以此達於聖聰耳不揆蕪淺謹投延恩匭進表獻上以聞謹言

賦

當九秋之淒清見一鶚之直上以雄材為已任橫殺氣而獨往捎捎勁翮肅肅遺響杳不可追俊無留賞彼何鄉之性命碎今日之指掌伊鷙鳥之累百敢同年而爭長此鵬之大略也若乃虞人之所得也必以氣稟玄冥

陰乘甲子河海蕩滴風雲亂起雪沍山陰冰纏樹死迷
向背於八極絕飛走於萬里朝無所充腸夕違其所止
頗愁呼而蹭蹬信求食而依倚用此時而啄朽待弋者
而網紀表狎羽而潛窺順雄姿之所擬歛捷來於森木
固先繫於利觜解騰攫而竦神開網羅而有喜獻禽之
課數備而已及乎閩諫受之也則擇其清質列在周垣
揮拘攣之掣曳挫豪梗之飛翻識畋遊之所使登馬上
而孤騫然後綴以珠飾呈於至尊搏風槍鼎用壯旌門

乘輿或幸別館獵平原寒蕪空闊霜仗喧繁觀其夾翠
華而上下卷毛血之崩奔隨意氣而電落引塵沙而晝
昏豁堵墻之榮觀棄功效而不論斯亦足重也至如千
年孽狐三窟狡兔恃古塚之荆棘飽荒城之霜露回惑
我往來超超我場圃雖青骹戴角白鼻如瓠蹙奔蹄而
俯臨飛迅翼以遐寓而料全於果見迫寧遽屢攬之而
穎脫便有若於神助是以嘒嘒其音颯爽其慮續下韝
而繚繞尚投跡而容與奮威逐北施巧無據方蹉跎而

就擒亦造次而難去一奇卒獲百勝昭著風宿多端蕭
條何處斯又足稱也爾其鷓鴣鴉鴉之倫莫益於物空
生此身聯拳拾穗長大如人肉多奚有味乃不珍輕鷹
隼而自若託鴻鵠而為鄰彼壯夫之慷慨假強敵而逡
巡拉先鳴之異者及將起而遄臻忽隔天路終辭水濱
寧掩羣而盡取且快意而驚新此又一時之俊也夫其
降精於金立骨如鐵目通於腦筋入於節架軒楹之上
純漆光芒掣梁棟之間寒風凜冽雖趾躋千變林嶺萬

穴擊叢薄之不開突杈枒而皆折又有觸邪之義也久而服勤是可吁畏必使烏攫之黨罷鈔盜而潛飛梟怪之羣想英靈而遽墜豈比乎虛陳其力叨竊其位等摩天而自安與檣榆而無事者矣故不見其用也則晨飛絕壑暮起長汀來雖自負去若無形置巢截窠養子青冥倏爾年歲茫然闕廷莫試鉤爪空迴斗星衆鵠儻割鮮於金殿此鳥已將老於巖扃

白鵬賦

并序

蕭頴士

白鷗羽族之幽奇也素質黑章爪觜純丹體備冠距頗
類夫雞翟神兒清閒不雜於衆禽栖止遐深與人境罕
接固莫得而馴狎也上聞而徵焉處以雕籠致以驛騎
將集長楊游太液行有日矣天寶辛卯歲予旅泊江會
流宕逾時秋八月自山陰前次東陽方議夫南登西泛
極聞見之義諒褊懷所素蓄而未之從也會有命自天
召赴京闕適與茲鳥偕至于會稽之傳舍觀其宛頸旁
睨徊徨掩抑往往孤鳴音韻淒涼如慕侶而不獲因感

而賦之曰

鳥之生矣于彼江山彩之玄素文不綺斑備文武之玉
飾微妖姬之殊顏情莽眇以耿絜兒軒昂以安閒無馴
擾之近性故不愜於人寰遊必海裔栖必雲間冀養拙
以自保祛未萌之憂患不然豈陋彼都邑之佳麗顧投
身乎阻艱以其標自然之靜故名之曰白鷗者歟何天
聽之緬邈辱微禽之瑣細偶一日之見羈委微軀以受
制望層城以歛翼懷衆侶而孤唳從殿置之駿奔仰君

門以遐逝君門兮九重同叫窰兮穹崇池太液兮島方
壺萬族翔泳乎其中晝聒未央之繁絃夕警長樂之靈
鍾顧疎野之賤迹豈敢求一枝而見容越水清兮鏡色
吳山遠兮天逼窺淺深以颺影逗杳冥兮一息謂杉松
可得永日而噪聚萼苻足以窮年而啄食一與心賞兮
睽違念歸飛兮何極鸚能言而入座鶴善舞而登軒殊
二者之俗態諒慚惶於主恩是以雖信美而非其志獨
屏營而兢覓者焉

白鸚鵡賦

王維

若夫名依西域族本南海同朱喙之清音變綠衣於素
彩惟茲鳥之可貴諒其美之斯在爾其入翫於人見珍
奇質狎蘭房之妓女去桂林之雲日易喬枝以羅袖代
危巢以瓊室慕侶方遠依人永畢託言語而雖通顧形
影之非匹經過珠網出入金鋪單鳴無應隻影長孤偶
白鸚於池側對皓鶴於庭隅愁混色而難辨願知名而
自呼明心有識懷思何極芳樹絕想雕梁撫翼時銜花

而不言每投人以方息慧性孤稟雅容非飾含火德之
明輝被金方之正色至如海鶯呈瑞有玉筐之可依山
雞學舞向寶鏡而知歸皆羽毛之偉麗奉日月之光輝
豈憐茲鳥地遠形微色凌紈質彩奪繒衣深籠久閉喬
木長違儻見借其羽翼與遷鶩而共飛

感二鳥賦

并序

韓愈

貞元十一年五月戊辰愈東歸癸酉自潼關出息于河
之陰時始去京師有不遇時之歎見行有籠白鳥白鸛

鵠而西者號於道曰某土之守某官使使者進於天子
東西者皆避路莫敢正目焉因竊自悲幸生天下無事
時承先人之遺業不識干戈攻守耕穫之勤讀書著文
自七歲至今凡二十二年其行已不敢有愧於古人之
道其閒居思念前古當今之故亦僅志其一二大者焉
選舉於有司與百人偕進退曾不得薦書齒下士于朝
以仰望天子之光明今是鳥也惟以羽毛之異非有道
德智謀承顧問贊教化者乃反得蒙採擢薦進光輝如

此故為賦以自悼且明夫遭時者雖小善必達不遭時者累善無所容焉其辭曰

吾何歸乎吾將既行而後累思誠不足以自存苟有食其從之出國門而東驚觸白日之隆景時返顧以流涕念西路之差永過潼關而坐息窺黃流之奔猛感二鳥之無知方蒙恩而入幸惟進退之殊異增予懷之耿耿彼中心之何喜徒外飾焉是逞予生命之湮阨曾二鳥之不如汨東西與南北恒十年以不居辱飽食其有數

况策名與薦書時所好之為賢庸有謂余之非愚昔殷之高宗得良弼於宵寐孰左右者為之先容信天同而神比及時運之未來或兩求而莫致雖家到而戶說祇招尤而速累蓋上天之生余亦有期於下地盡永配於古人獨怡悵於無位雖得之而不能乃鬼神之所戲幸年歲之未暮庶無羨於斯類

白羽扇賦

并序

張九齡

開元二十四年夏盛暑奉勅遣大將軍高力士賜宰臣

白羽扇九齡與焉竊有所感立進賦曰

當時而用任物所長彼鴻鵠之弱羽出江湖之下方安
知煩暑可致清涼豈無紈素彩畫文章復有竹剖枿
毫芒提攜密邇搖動馨香惟衆珍之在御何短翮之敢
當與竊恩於聖后且見持於未央伊昔臯澤之時亦有
雲霄之志苟効用之得所雖殺身而何忌肅肅鳥羽穆
如微風縱秋氣之移奪終感恩於篋中

元猿賦

并序

道士吳筠

前志稱周穆王南征君子變為猿鶴小人變為蟲沙夫
神用無方未必不爾筠自入廬嶽則覩斯元猿嘉夫雨
昏則無聲景霽則長嘯不踐土石超遙於萬木之間春
咀其英秋食其實不犯稼穡深棲遠處猶有君子之性
異乎狙獠之倫且多難已來庶品凋敗麋鹿殫於網罟
遺氓困於誅求此獨蕭然物莫能患豈不以託跡冥絕
不才遠禍昔夫子歎山梁雌雉曰時哉時哉予因感之
聊以作賦

伊元猿之所有于南國之曾岑動不踐地居常在林雖
泛泛而無據亦熙熙而有心零嵐昏而共默風雨霽而
爭吟使幽人之思清暢羈客之涕霑襟何必聆嶰谷之
管對雍門之琴哉歷千尋之喬木俯萬仞之危嶠弄遊
雲之亂飛嬉落日之橫照連肱澗飲命侶煙嘯或聚而
閒棲或分而迴趨壽同靈鸛性本君子阻重巖之險非
虎豹所履蔭交柯之密豈鵬鶚能視故逢蒙操弓憚高
深而止鄧公折箭含惻隱而已何患累之罕臻不干物

以利已詎若狒狒凌人以就戮猩猩甘酒而遄死夫時
珍貂裘世寶狐白徒能工於隱伏終見陷於機辟麝懷
香以賈害狙伐巧而招射小則翡翠殞於毛羽大則犀
象殘於齒革孰能去有用之損取無用之益因棄置於
常情永逍遙以自適無威刑以相臨有族類而相親食
資諸物衣取諸身不賦不役靡勞靡勤如政教之未施
保巢居之淳淳匪虞氏之所及何狙公之能馴吾固知
人為物之貴又焉測元化之所大均乎

麀尾賦

并序

陳子昂

甲子歲天子在洛陽時余始解褐與秘書省正字太子
司直宗秦客置酒於金谷亭大集賓客酒酣共賦座上
食物命余為麀尾賦焉

天之浩浩兮物亦云云性命變化兮如絲之棼或以神
好正直天蓋默默或以道惡强梁天亦茫茫此仙都之
微獸因何負而罹殃始居幽山之藪食乎豐草之鄉不
害物以利己每營道而同方何忘情以委代而任性之

不忘卒累網以見逼受庖割而罹傷豈不以斯尾之有
用而殺身於此堂為君彫俎之羞廁君金盤之實承主
人之嘉慶對象筵與寶瑟雖信美於茲辰詎同歡於疇
日客有感之而歎曰命不可思神亦難測吉凶悔吝未
始有極假如天道之用莫神於龍受戮為醢不知其凶
王者之瑞莫聖於麟遇害於野不知其仁神既不能自
智聖亦不能自知況林棲而谷走及山鹿與野麋古人
有言天地之心其間無巧冥之則順動之則天諒物情

之不異我心又何兢於猜矯故曰天之神明與物推移
不為事先動而輒隨是以至人無已聖人不知子欲全
身而遠害曾是浩然而順斯

由鹿賦

并序

呂溫

貞元丁卯歲予南出襄樊之間遇野人繫鹿而至者問
之荅曰此為由鹿由此鹿以誘致羣鹿也備言其狀且
曰此鹿每有所致輒鳴嗥不飲食者累日余喟然歎曰
虞之即鹿也必以其類致之人之即人也亦必以其友

致之實繁有徒古之然矣嗟乎鹿無情而猶知痛傷人之與謀宴安殘酷者彼何人斯彼何人斯物微感深遂作賦曰

鹿之生兮亦稟亭毒備齒角以無競循性情而自牧姑有味於行止尚焉知乎倚伏捨爾崇林輕遊近麓偶巧網之生致蒙主人之全育飲以渫井飼于芳庭寢卧荃柔騰倚蘭馨露往霜來日安月寧雖矯性之非樂終感恩而不驚曾不知養非玩物用有深意命之曰由俾陷

其類涼秋八月爽景清氣羈致山阿縻于蹊遂設伏以
待翳叢而伺同氣相求誘之孔易將必慕侶豈云貪餌
呦呦和鳴麋麋狎至彼泯慮於猜信此無情於誠偽孰
是蒼卒禍生所忽毒鏑歟以星貫潛機劃其電發或洞
胷而達腋或折足而碎骨望林巒兮非遠顧町疇兮未
滅風嗥澤而北至日掩山而西沒走駭侶於巖煙叫飢
麋於澗月苟行路之聞者孰不心摧而思絕想爾由矣
野心而仁望純束兮驚顧隨獲車兮逡巡視鼎中之銷

爛觀机上之剖分忽哀鳴以感類若沈痛之在身雖復處之密邇享以豐珍比檻猿之駭躍同海鳥之愁辛敢擇蔭而後止思走險以何因痛無知以相陷含怨毒而莫伸客有感而言曰物誠有諸人亦宜乎撫事或比原心則殊借如淮陰構禍寃在神理通說且拒狝謀寧起堂堂蕭公實曰知己結致鍾室胡寧忍此呂祿之難誰非漢臣交則不義賣亦不仁彼美酈生既為交親誘襲軍印豈無他人於戲微獸傷類如不自容伊人賣友而

享其功滅交道兮墜義風曾麋鹿之不若何仁信之可
宗已焉哉諒此世之茫茫吾未見其始終

蠶賦 并序

陸龜蒙

荀卿子有蠶賦楊泉亦為之皆言蠶有功於世不斥其
禍於民也余激而賦之極言其不可能無意乎詩人碩
鼠之刺於是乎在

古民之衣或羽或皮無得無喪其游熙熙藝麻緝纊官
初喜窺十奪四五民心乃離逮蠶之生繭厚絲美機杼

經緯龍鸞葩卉官涎益嘍盡取後已嗚呼既豢而烹蠶
實病此伐桑滅蠶民不凍死

秋蟲賦

并序

羅隱

秋蟲蜘蛛也致身網羅間實腹亦網羅間愚感其理有
得喪因以言賦之

物之小兮迎網而斃物之大兮兼網而逝網也者繩其
小而不繩其大吾不知爾身之危兮腹之餒兮吁

蝨賦

李商隱

亦氣而孕亦卵而成晨鳧露鶴不知其生汝職唯齧而
不善齧回臭而多跼香而絕

後蝨賦

并序

陸龜蒙

余讀玉谿生蝨賦有就顏避跼之嘆似未知蝨作後蝨
賦以矯之

衣緇守白髮華守黑不為物遷是有恒德小人趨時必
變顏色弃瘠涵腴乃蝨之賊

蝨賦

李商隱

夜風索索緣隙憑壁弗聲弗鳴潛此毒螫厥虎不翅厥
牛不齒爾兮何功既角而尾

唐文粹卷七

欽定四庫全書薈要卷一萬九千八百二十一

集部

唐文粹卷八

宋姚鉉編

古賦辛

總七首

古器三

霜鍾賦

喬潭

歌器賦

李德裕

砥石賦

劉禹錫

物景二

晚晴賦

杜牧

秋聲賦

劉禹錫

決疑二

問大鈞賦

何卜賦

霜鍾賦

并序

喬潭

南陽豐山有九鍾焉霜降則鳴潭叨遇達奚公擢甲科
然則南陽即公隱居之舊地為此賦以廣知音焉

豐山之峰巒品積翠之石森爽冒寒之松上無飛鳥下
無人蹤深杳杳以靜謐有天然之古鍾兩樂神資九乳
靈化寧失制於侈拚豈遺音於窈窕每虛氣以自得常
宿懸以警下動於耳而藏於心必高秋之涼夜於是沉
寥兮日暮而天晶蕭瑟兮霜落而風清爽氣無朕潛來
滿盈跳然復出鏗爾有聲信不擊而不考能大鳴而小
鳴始則含糊擁鬱旋復充訕若往若還徘徊其間爾其
舒肆奔放長齊遠暢乍浮空以紆餘更觸物而瀏亮入

林蕭蕭在水湯湯泛濫小瀨聯綿疎篁夜鶴怨兮彌苦
寒猿悲兮更長餘韻春容隨風悠揚繞於洞庭浮於瀟
湘梧楸紛以離披蒹葭颺其蒼蒼及夫夜已艾兮彌靜
山無人兮月冷初肅肅以自淒復琅琅而虛警其動愈
出其來甚徐合於元化遊於太虛轉遠而盡誰知所如
聊獨坐以傾聽惘若失乎躊躇聽不及想以存其餘方
其寒氣曉集鏘然應急發越林巒周流井邑前聲未盡
後韻相及羈臣之空館屢來思婦之高樓遠入無不悵

然驚夢歔歔掩泣夫鍾之應霜也應以無心士之知已也貴知其音不鼓而鳴者其聲遠不言而信者其分深故自然之聲無假於煩手持達之分不資於騰口吾欲徵華鍾喻良友懷音淵默藏器虛受可以適南陽待清霜之一扣系曰風籟起兮喧長薄霜鍾鳴兮動哀壑合大塊兮聲無作雖有聞兮常寂寞

歌器賦

并序

李德裕

癸丑歲余時在中樞丞相路公見遺歌器贈以古人之

物永懷君子之心嘗欲報以辭賦屬力小任重朝夕盡瘁固未暇於體物今者公已歿世余又放逐忽覩茲器淒然懷舊因追為此賦置公之靈筵

昔周道既平既安且寧赫赫公旦配德阿衡謂難守者成難持者盈始作茲器告于神明至仲尼憲文武之道思周公之德入太廟而觀器見遺法而歎息且日月滿而虧日中則是彼天道之常然欲久盛而焉得乃沃水於器俯察要終挹彼注茲受之若冲虛則詭碗似君子

之困蒙中則端平如君子之中庸滿則傾跌霆流電發
器如隄隤水若河決非神鼎之自盈異衢樽之不竭蓋
欲表人道之隆替明百事之有節然茲器也不以中而
自藏不以跌而自傷其過也如彼薄蝕其更也浸彼輝
光得其道者居則念於豐蔀動乃思於謙受顏既復而
不遠惠屢黜而何咎知任重之力及悟物盈之難久雖
神道之無形常慘然於前後昔與君子同秉國鈞公得
之為賢相余失之為放臣覩遺物而猶在懷舊好而悲

辛思欲克己以復禮永報德於仁人

砥石賦

并序

劉禹錫

南方氣泄而雨淫地慝而傷物媪神噫濕渝色壞味雖
金之堅亦失恒性始余有佩刀甚良至是澁不可拔剖
其室乃出遡陽眇眇傳刃蒙脊鱗然如瘡痂如黑子如
青蠅之惡銳氣中錮猶人被病然客有聞焉哀密石以
遺予沃之草腴雜以鳥膏切磨下上直質焯見躊躇四
顧迫爾謝客微子之貽幾喪吾寶客曰吾聞諸梅福曰

爵祿者天下之砥石也高皇帝所以礪世磨鈍有是耶
余退感其言作砥石賦

我有利金兮以利為佩遭土卑而慝作雄銛為之潛晦
如景昏而蝕既兮與肌漆而為癘顧秋蓬之不可刺兮
尚何遊乎髀髀之外利物蒙蔽材人惆悵俾百汰之至
精蟠一檢而多恙豈害氣之獨然兮將久不試而然彼
屠者之刀兮獵者之鋌不灌不淬兮糅錯銜鉏日鼓月
揮兮剗腴擊鮮睨燿燿以耀芒翦淫夷而騰羶豈不以

涉暑而蒙沴兮鼎用之而成妍有客自東遺余越砥圭
形石質蒼色膩理剗其鱗皴滑以滌滌如衣澣垢如鼎
出否霧盡披天萍開見水拭寒焰以破背擊清音而振
耳故態復還寶心再起既賦形而終用一蒙垢焉何耻
感利鈍之有時兮寄雄心於瞪視嗟乎石以砥焉化鈍
為利法以砥焉化愚為智武王得之商俗以厚高帝得
之傑材奔走得既有自失豈無因漢氏以還三光景分
隨道闊狹用之得人五百餘年唐風始振懸此大砥以

磬兆民播生在天成器在君天為物君君為人天安有
執礪世之具而患乎無賢歟

晚晴賦

并序

杜牧

秋日晚晴樊川子目于郊園見大者小者有狀類者故
書賦云

雨晴秋容新沐兮忻遶園而細履面平池之清空兮紫
閣青橫遠來照水如高堂之上見羅幕兮垂乎鏡裏木
勢黨伍兮行者如迎偃者如醉高者如達低者如跂松

數十株切切交峙如冠劔大臣國有急難庭立而議竹

林外裏兮十萬丈夫甲刃縱縱密陣而環侍豈負軍令

之不敢囂兮何意氣之嚴毅復引舟于深灣忽八九之

紅芰姹然如婦歛然如女墮藥黥顏似見放棄白鷺潛

來兮邈風標之公子窺此美人兮如慕悅其容媚雜花

差於岸側兮絳綠黃紫格頑色賤兮或妾或婢閒草甚

多叢者束兮靡者沓兮仰風獵日如立如笑兮千千萬

萬之容兮不可得而狀也若予者則謂何如倒冠落珮

兮與世闊疎教教休休兮真徇其愚而隱居者乎

秋聲賦

并序

劉禹錫

相國中山公賦秋聲以屬天官太常伯唱和俱絕皆得
時道行之餘興猶動光陰之歎況伊鬱老病者乎吟之
斐然以寄孤憤

碧天如水兮窅窅悠悠百蟲迎暮兮萬葉吟秋欲辭林
而蕭颼潛命侶以啁啾送將歸兮臨水非吾土兮登樓
晚枝多露蟬之思夕草趣寒蛩之愁至若松竹含韻梧

楸早脫驚綺疏之晚吹墮碧砌之涼月念塞外之征行
顧閨中之騷屑夜蛩鳴兮機杼促朔鴈叫兮音書絕遠
杵續兮何泠泠虛室靜兮空切切如吟如嘯非竹非絲
合自然之宮徵動終歲之別離廢井苔合荒園露滋草
蒼蒼兮人寂寂樹槭槭兮蟲伊伊則有安石風流巨源
多可平六符而佐主施九品而自我猶復感陰蟲之鳴
軒歎涼葉之初墮異宋玉之悲傷覺潘郎之么麼嗟乎
驥伏櫪而已老鷹在韝而有情聆朔風而心動盼天籟

而神驚力將殍兮足受紕猶奮迅于秋聲

問大鈞賦

并序

始余失臺郎為刺史又貶州司馬俟罪朗州三見閏月
人咸曰數之極理當遷焉因作謫九年賦以自廣是歲
臘月詔追明年自闕下重領連山郡印綬咸曰美惡周
必復第行無恤歲杪其復乎居五年不得調歲二月有
事于社前一日致齋孤居慮靜滯念歛起伊人理之不
可以曉也將質諸神乎謹貢誠馳精敢問大鈞其夕有

遇寤而次第其辭以為賦

圓方相涵兮浩其無垠
窅冥翕闔兮走三辰以騰
孰主

張是兮有工其神迎隨
不見兮強名之曰大鈞
歌以臨

下兮巍乎雄尊天為獨
陽高不可問工居其中
與人差

近身執其權心平其運
循名想像或可以訊曰
嘻蒙之

未生其猶泥爾落乎埏
埴唯鈞所指忽然為人
為幸大

矣工賦其形七情與俱
嗇智不授卑去聲之以愚
坦坦之

衢萬人所趨蒙一布武
化為畏途人或譽平聲之
百說徒

虛人或排之半言有餘物壯則老乃唯其常否終則傾
亦不可長老先期而驟至今否踰數而巨量雖一夫不
獲兮亦大化之攸病謹薦誠上問兮俛伏以聽是夕寐
熟夢遊乎無何有之鄉抗陛級乎重霄兮異人間之景光
中有威神巾金甲而煒煌命之使前兮其音琅琅曰吾
大化之一工也居上臨下廉其不平汝今有辭吾一以
聽播形肖貌生類積億橐籥圉匡鎔鍊消息我之司智
初不爾嗇不守以愚覆為汝賊既賦汝形輔之聰明盍

求世師資適攸宜胡然抗心遐想前烈倚梯青冥舉足
斯跌韜爾智斧無為自伐鑿竅太繁天和乃洩利逕前
誘多逢覆轍名腸內煎外火非熱今哀汝窮將厚汝愚
剔去剛健納之柔濡塞前竅之傷痍兮招太和而與居
貫以待人兮急以自拘道存邃奧無示四隅軌物之勢
不作兮見傷之機自無汝不善用吾焉嗇乎且夫貞而
騰氣者膺膺健而垂精者昊昊我居其中猶輪是蹈以
不息為體以日新為道保鱗蜚走灌莽苞阜乃牙乃甲

乃殞乃剖陽榮陰悴生濡死藁各乘氣化不以意造賦
大運兮無有淑惡彼多方兮自生醜好爾奚不德余以
驟壯姑尤我以速老耶觀汝百為又或不然赤子哇哇
忽其能言亦既名物幾時蹣跚春耕其丘投種之日釋
耒而歎何時實粟望所未至謂余舒舒欲其久留謂我
瞥如我一子二誰之曲歟彼蒹葭之蒼蒼兮霜霰苦而
中堅松竹之皴皴索籜兮不若櫛筍之可憐納材葦而
構明堂兮固容消而力完揚且之哲兮不可以常然當錫

爾以老成蒼眉皓髯山立時行去敵氣與矜色兮噤危
言以端誠俾人望之侮黷不生爾之所得孰與壯多不
善處老問余而何受教而迴遽遽形開嚮之威神孰為
來哉乃遽衣促盥端慮滌想委珮伍簪持簿叩額而言
曰楚臣天問不訓今臣遇幸一獻三售始厚以愚終期
以壽忘上問之罪濯已然之咎心增故術腸飽新授馳
神清玄拜手稽首


何卜賦

余既幻惑力命之說兮身久放而愈疑心回穴其莫曉
兮將取質夫東龜楚人俗巫而好術兮叟有鬻卜而來
思乃招而訊之曰嘻人莫不塞有時而通伊我兮久而
愈窮人莫不病有時而間伊我兮久而滋蔓吾聞人肖
五行動止有則四時轉續變於所極一歲之旱人斯具
舟三月之熱人斯具裘極必反焉其猶合符子首圓而
足方予腹陰而背陽胡形象之有肖而變化之殊常經
曰剝極則賁居賁而未嘗剝者其誰否極受泰居否而

未嘗忝者又其誰鶴胡不截鳧胡不裨夔何罰而蹉跎
蚘何功而扶持紛紜恣睢交作舛馳似與似奪似信似
欺孰主張之問于子龜卜者曰招我以粗問我以微有
天下之是非有仁人之是非在此為美兮在彼為蚩或
昔而成或今而虧君問曷由主張其時時乎時乎去不
可邀來不可逃淹兮孰捨操莖之毒豕苓雞首之賤毛
各於其時而伯霸音其曹屠龍之伎非曰不偉時無所用
莫若履狶作俑之工非曰可珍時有所用貴于斲輪絡

首縻足兮驥不能跬前無所阻兮跛鼈千里同涉于川
其時在風泐者之吉沂者之凶同藝于野其時在澤伊
種之利乃糝之厄故曰是耶非耶主者時耶諒淑惡之
同出兮顧所丁之若何夫如是得非我美失非我耻其
去曷思其來曷期姑蹈常而俟之夫何卜為言訖執龜
而起予退而作何卜賦於是蹈道之心一而俟時之志
堅內視羣疑猶氷釋然

唐文粹卷八



總校官庶吉士臣張能照
校對官庶吉士臣翟槐

謄錄監生臣李愬滋
謄錄貢生臣王嘉稷

欽定四庫全書薈要

集部

唐文粹卷九

十

詳校官候選知縣臣吳甸華



欽定四庫全書薈要卷一萬九千八百二十二

集部

唐文粹卷九

宋姚鉉編

古賦十首

修身一

動靜交相養賦

白居易

哀樂愁思八

懷忠賦

歐陽詹

泛渭賦

白居易

望賦

劉禹錫

惜餘春賦

李白

江上愁心賦

張說

別知賦

韓愈

愛而不見賦

蕭穎士

傷往賦

劉禹錫

夢一

夢渴賦

何諷

動靜交相養賦

并序

白居易

居易常見今之立身從事者有失於動有失於靜斯由
動靜俱不得其時與理也因述其所以然用自儆導命
曰動靜交相養賦云

天地有常道萬物有常性道不可以終靜濟之以動性不
可以終動濟之以靜養之則兩全而交利不養之則兩傷而
交病故聖人取諸震以發身受以復而知命所以莊生曰
智養恬易曰蒙養正者也吾觀天文其中有程日明則月

晦日晦則月明明晦交養晝夜乃成吾觀歲功其中有信
陽進則陰退陽退則陰進進退交養寒暑乃順且躁者本
於靜也斯則躁為民靜為君以民養君教化之根則動養
靜之道斯存且有者生於無也斯則無為母有為子以母
養子生成之理則靜養動之義明矣所以動之為用在氣
為春在鳥為飛在舟為楫在弩為機不有動也靜將疇依
所以靜之為用在蟲為蟄在水為止在門為楗在輪為柅
不有靜也動奚資始則知動兮靜所伏靜兮動所倚吾何

以知交養之然哉以此有以見人之生於世出處相濟
必有時而行非匏瓜不可以長繫人之善其身枉直相
循必有時而屈故尺蠖不可以長伸嗟夫今之人知動
之可以成功不知非其時動亦為凶知靜之可以立德
不知非其理靜亦為賊大矣哉動靜之際聖人其難之
先之則過時後之則不及時交養之間不容毫釐故老
氏觀妙顏子知幾噫非二君子吾誰與歸

懷忠賦 并序

歐陽詹

丙寅歲因受譴季冬之月次于殷墟歷闕龍逢墓焉昔
聆其風未嘗不迴腸竇涕覩夫塋壟心又增傷遂寫憤
於言為賦以弔先生以忠諫致命故以懷忠命篇云

天生彼辛兮用殲覆於夏家欲悠悠而罔極毒浩浩而
無涯無辜殞身肆市朝之若莽有道併命委炮烙以如
麻伊先生之諤諤為酷烈之所加嘗披圖於往載每廢
卷於興嗟蕭條舊邑莽蒼空陂陷陵成坎古木無枝或
人曰此其墓也又一倍以增悲嗚呼麟非騰噬之儔詎

虎狼之共穴鳳實仁靈之類豈鷹鷂之同列惟玉石之
明分亦薰蕕之自別是以蹇蹇心競昂昂面折彼炎炎
之原燎信撲撲而不滅寧歸死以申懷不貪生而結舌
痛矣哉古人有言輔仁者天福善者神胡為是日功不
如人使典章之不信俾忠義之空勤律中大呂日臨蒙
谷風颭颭於衰草煙茫茫乎平陸思悽悽而填臆淚淫
淫以盈目義則非其知友親故遠夫骨肉節臨危而不
撓行於艱而彌篤惟其有之是以傷之而慟哭

泛渭賦并序

白居易

右丞相高公之掌貢舉也予以鄉貢進士舉及第左丞相鄭公之領選部也予以書判拔萃登科十九年天子並命二公對掌鈞軸朝野無事人物甚安明年春予為校書郎始徙家秦中卜居渭上上樂時和歲稔萬物得其宜下樂名遂官閒一身得其所既美二公佐清靜之理又荷二公垂特達之遇發於嗟嘆流為詠歌于時泛舟於渭因作泛渭賦以導其意辭曰

亭亭華山下有人跂兮望兮愛彼三峯之白雲泛泛渭
水上有舟公兮沂兮愛此百里之清流以我為太平之
人兮得於斯而優游又感陽春之氣熙熙兮樂天和而
不憂曰予生之幸兮時哉時哉當皇唐受命之九葉兮
夷與華而無氛埃及皇帝繼位之二紀兮命高與鄭為
鹽梅二賢兮爰立四門兮大開凡讀儒書與履儒行者
率充賦而四來雖片藝而必收兮故不棄予之小才感
再遇於知己心慙忤以徘徊登予名於太常署予職於

蘭臺臺有蘭兮閣有芸芳菲菲兮可襲備一官而無事
又不維而不繫家去省兮百里每三旬而一入川有渭
兮山有華澹悠悠其可賞目白雲兮漱清流且或偃而
或仰門去渭兮百步常一日而三往夜分兮扣舷天無
雲兮水無煙遲遲兮明月波淡灩兮棹黃緣日暮兮舟
泊草萋萋兮沙漠漠習習兮春風岸柳動兮渚花落發
浩歌以長引舉濁醪而緩酌春冉冉兮其將盡予何為
乎不樂鳥樂兮雲際鳴嚶嚶兮飛裔裔魚樂兮泉底鬢

撥撥兮尾湫湫我樂兮聖代心融融兮神泄泄伊萬物
各得其樂者由聖賢之相契賢致聖於無為聖致時於
既濟凝為和兮聚五福發為春兮銷六沴不我後兮不
我先適當我今生之世彼鱗蟲與羽族咸和樂而不知
惠我為人兮最靈所以愧賢相而荷聖帝樂乎樂乎泛
于渭兮詠而歸聊逍遙以卒歲

望賦

劉禹錫

邈不語兮臨風境自外兮感從中明晦轉續兮八極鴻

蒙上下交氣兮羣生異容發孤照于寸眸驚遐情乎太
空物乘化兮多象人遇時兮不同嗟乎有目者必騁望
以盡意當望者必緣情而感時有待者瞿瞿忘懷者熙
熙慮深者瞠然若喪樂極者沖然無違外徙倚其如一
中糾紛兮若斯望如何其望最樂晞慶霄兮遡阿閣如
雲兮天顏咫尺如草兮臣心踴躍扇交翟兮歲蕤旗升
龍兮蠓略日轉黃道天開碧落凝瑞景於庭樹掬非煙
於殿幕望如何其望且懽登灞岸兮見長安紛擾擾兮

紅塵合鬱葱葱兮佳氣盤池象漢兮昭回城依斗兮闌
干避御史之驄馬逐倖臣之金丸望如何其望彼好宗
萬靈兮越四隩漢帝仙臺兮秦皇海嶠霓衣踴於河上
馬跡窮乎越徼紫氣度關而斐蠢神光屬天而照耀睨眷
眷以馳精聳專專而觀妙望如何其望有形視蠢蠢兮
窮冥冥楚塞氛惡兮蕭關燧明暈籠孤月角奮長庚沙
多似雪磧有疑城煙雲非女子之氣草木盡王者之兵
審曳柴之虛警破來騎之先聲信有得於風鳥示無言

於旆旌望如何其望且慕恩意隔今年光鶩雕輦已辭
兮金屋何處長信草生兮長門日暮倏翠華之儻來仰
玄天以自訴況復湘水無還漳河空注淚染枝葉香餘
紈素風蕭蕭兮北渚波煙漠漠兮西陵樹夫不歸兮江
上石子可見兮秦原墓拍琴翻朔塞之音挾瑟指邯鄲
之路望如何其望最傷佩環玦兮思帝鄉龍門不見兮
雲霧蒼蒼喬木何許兮山高水長春之氣兮悅萬族獨
含嘯兮千里目秋之景兮懸清光偏結憤兮九回腸美

環拱於白榆惜馳暉於落棠諒衝斗兮誰見伊戴盆兮
何望平聲豈止蘇武在胡管寧浮海送飛鴻之滅沒附陰
火之光彩鶴頸長引烏頭未改恨已極兮平原空起何
時兮東山在永望如何傷懷孔多降將有依風之感宮
人成憶月之歌歌曰張衡側身愁思久王粲登樓日迴
首不作渭濱垂釣臣羞為洛陽拜塵友

惜餘春賦

李白

天之何為令北斗而知春兮迴指於東方水蕩漾兮碧

色蘭蕙兮紅芳試登高而望遠極雲海之微茫
一
去兮欲斷淚流頰兮成行吟青楓而詠滄浪
懷洞庭兮悲瀟湘何余心之縹緲兮與春風而飄揚
思飄揚兮無限念佳期兮莫展平原萋兮綺色
愛芳草兮如翦惜餘春之將闌每為恨而不淺
漢之曲兮江之潭把瑤草兮思何堪想遊女於峴
北愁帝子於湘南恨無極兮心氤氲目眇眇兮
憂紛紛披衛情於淇水結楚夢於陽雲春每歸
兮花開花已闌兮春改嘆長河之流春送馳波於東

海春不留兮時已失老哀颯兮情逾在恨不得挂長繩
於青天繫西飛之白日若有人兮情相親去南國兮往
西秦見遊絲之橫路網春輝以留人沉吟兮哀歌躑躅
兮傷別送行子之將遠看征鴻之稍滅醉愁心於垂楊
隨柔條以糾結望夫君兮興咨嗟橫涕淚兮怨春華遙
寄影於明月送夫君於天涯

江上愁心賦

張說

江上之峻山兮鬱崎嶇

音儀

而不極雲為峯兮煙為色歟

變態兮心不識江上之深林兮杳冥濛而不已鳥為花
兮猿為子紛盪養兮言莫擬夏雲陰兮若山秋水平兮
若天冬沙飛兮淅淅春草靡兮芊芊感四時之默運知
萬化之潛遷伴衆鳥兮寒渚望孤帆兮日邊雖欲貫愁
腸於巧筆紡離夢於哀絃是心也非模放之所逮將有
言兮是然將無言兮是然

別知賦

韓愈

予取友於天下將歲行之兩周下何深之不即上何高

之不求紛擾擾其既多或喜能而好修寧安顯而獨裕
顧阨窮而共愁惟知心而難得斯一旦而為收歲癸未
而遷逐侶虫蛇於海陬遇夫人之來使闢公館而羅羞
索微言於亂志發孤笑於羣憂物何深而不考理何隱
而不抽始參差以異序卒爛漫而同流何此懼之不可
恃遂駕馬而迴輶山礚礚其相軋樹蓊蓊其相樛雨浪
浪其不止雲浩浩其常浮知來者之不可以數哀去此
而無由倚郭郭而掩涕空盡日以遲留

愛而不見賦

蕭穎士

嗟乎或愛之而不見者有矣何必周秦異代夷夏殊軌
阻嚴城之九重限方舟之一水苟時事之多怨故人遐
而室邇關山起於足下堂上遠乎千里聳專專之目成
遽時逝而復止詩人所以思婉孌而搔首賦城隅之有
俟吁不得其已也惟夙昔之良會夢佳期於北方歎渤
海之三山吸流霞之景光含芳辭以貺予云惠好之不
忘願服義於永日陪遊嬉於帝鄉廣莫忽其飄怒鯨波

洵而騰張俄驚魂以輟寐間窮髮之茫茫將揭厲以復
從駛風濤之匪量顧投軀以靡吝撫遺體以兢惶晨切
切以悽愴夕屏營以彷徨追前懽之俯邇歎此恨之悠
長於是收神返慮澄澹靜默冥然就寢兀若無識冀良
宵之復遇希舊遊之可即徒有願兮且未克憂沉深兮
萃冒臆風兮雨兮何極

傷往賦

并序

劉禹錫

人之所以取貴於蜚走者情也而誕者以遣情為智豈

至言耶予受室九年而鰥痛苦人之天閱弗遂也作賦以傷之冀夫覽者有以增伉儷之重云

歎獨處之邑邑兮憤伊人之我遺情可殺而猶毒境當懼而復悲人或朝嘆而暮息夫何越月而逾時太極運乎三辰轉寒暑而下馳有歸於無兮盛復於衰猶昧爽之必暮又安得而怨咨我今怨夫若人兮曾旭旦而潛暉飄零日及之萼倏忽蜉蝣之衣川走下而不還露迎陽而易晞恩已甚兮難絕見無期兮永思我行其野農

民桑者舉桡來饁亦在林下我觀於途裨販之夫同荷
均挈荆釵布襦羽毛之蕃鱗介之微和鳴灌叢雙泳漣
漪薨薨者蟲蠢蠢伊豸遊空穴深兩兩相比何動類之
萬殊必雄雌而與俱物莫失儷以孤處我方蹢蹢而焉
如我復虛室目淒涼兮心伊鬱心伊鬱兮將語誰坐匡
牀兮撫嬰兒何所丐沐兮何從仰飴襦袴在身兮昔圍
差跌輦囊附臂兮餘馥歲蕤誠天性之潛感顧童心兮
如疑曉然有難繼之慕漠然減好弄之姿指遺桂兮能

認慙空帷兮欲歸我入寢宮痛人亡兮物改其容寶瑟
僵兮絃柱絕瑤臺傾兮鏡奩空寒爐委灰虛幌多風隙
駟晨轉牕蟾夜通步搖昏兮網粘翡翠芳褥掩兮塵化
蛩蛩閱刀尺之餘澤見巾箱之故封翫服儼兮猶具繁
華謝兮焉從想翩翩於是非求憲宰與冥蒙信奇術之
可致嗟此生兮不逢徒注視以寂聽恍神疲而目窮還
抱影以獨出紛百哀而攻中系曰龍門風霜苦別鶴哀
鳴夜銜羽吳江波浪深雌劒一去無遺音悲之來兮憤

予心洵如行波游浸淫悵緣情而莫極思執禮以自箴
已焉哉冉冉生死悠悠古今乘彼一氣兮聚散相尋或
鼓而興或罷而沉以無涯之情愛悼不駐之光陰諒自
迷其有分徒終怨於匪忱彼蒙莊兮何人予獨累嘆而
長吟

夢渴賦

何諷

不宿食以晨飲困鍾盂以沉寢永春晝而高局墮幅巾
而橫枕及乎酒適衷腸神遊異方煙生喉舌惘然如狂

爰瞰甃以窺汲諒不任於呼吸俄據河而俯瀆乃器舟
而杯斛倒魚鼈之窟宅見蛟龍之委伏猶胃腸之不決
資宴飲而未足由是奔九江走五湖手不暇於幹運心
不息於躊躇見波漸竭而百川如綫岸益高而底淤將
枯腹慊爾而未覺肺燥然而不濡尋至大溟茫然連清
豈爾浩瀚而吾量不盈斟酌未幾條見涯涘百靈稽首
乞留濡漑吾腹未充豈汝為意俄傾竭於浩渺奄滴瀝
而無漬瑤宮貝闕盡列平地三山赤城可以步至鯤鯨

噍喁相煦以呬大鵬驚攫巨鰲愕眙四顧燥涸悒然興
情此情何奇非吾所知恨滄海之可罄不足充吾之所
思周遭有截塊然埽塼水府萬族咸呼帝闕帝且不聞
吾欲未竭方將尋蟻垤期耿恭問姜母以何在訪舒姑
而欲從辨夸父於渭上弔相如於臨邛萬計已盡六腑
如燼窓日斜照飛蚊遶鬢既驚既覺可歎可笑飲不盡
器枯腸已療措頤沉吟其意逾深以吾此日之一夢見
自古不足者之心

唐文粹卷九